

## Molaetsa oa ho Arolelanoa



### SABATHA THAPAMA

#### Bakeng sa Boithuto ba Beke Ena Bala:

2 Pet. 1:12, 16–21; Tšen. 19:11–18; Tšen. 14:14–20; Moek. 12:13, 14; Tšen. 14:6–12.

#### Teman'a Khopolo:

“Hape, ka bona lenyeloi le leng le fofang mahareng a leholimo, le tšoere Evangeli ea ka mehla le mehla ho e bolella ba ahileng lefats'eng, le lichaba tsohle, le mefuta eohle, le lipuo tsohle, le merabe eohle; la re ka lentsoe le phamileng: Tšabang Molimo, isang khanya ho oona, hobane nako ea ho ahloa ha oona e tlile; ‘me le khumamele ea entseng leholimo, le lefatše, le leoatle, le liliba tsa metsi’ ” (Tšenolo 14:6, 7).

**L**efu la Kreste la tefelo le ne le akaretsa bohle; le ne le le bakeng sa batho bohle ba kileng ba phela, ho sa natse sebaka le nako. Kahona, evangeli e bua le batho ba lipuo tsohle, meetlo eohle, le libaka tsohle. E koala makhalo a merabe. Ke litaba tse monate tsa hore Jesu, bophelong ba Hae, lefung, le tsohong, o hlotse mebuso le matla a lihele. Evangeli e bua ka Jesu kaofela ha eona. O re shoetse ‘me joale oa re phelela. O tlile hang ho re lopolla kotlong le matleng a sebe ‘me o tla hape ho re lopolla boteng ba sebe. O shoele lefu le neng le lokela rona hore re tle re phele bophelo bo loketseng Eena. Ho Kreste ra lokafatsoa, halaletsoa, ‘me ka tsatsi le leng re tla apesoa khanya. Bible e bua ka hotla ho hobeli ha Jesu. O tlile pele hore a tla re boloke ‘me O tla boela a tle ho tla nkela hae seo a se rekileng ka theko e holimo. Buka ea ho qetela ea Bible, Ts’enolo, e ngolletsoe ho lokisetsa lefats’e ho khutla ha Jesu. Ke molaetsa o mahlonoko bakeng sa moloko ona. Thutong ea beke ena, re tla ithuta ka moo Ts’enolo e ngolletsoeng Sechaba se phelang ka 2020. Hammoho re tla fumana boipiletso bo bocha ba Jesu ho kereke ea Hae ea mehla ea bofelo le ka moo re ka phatlalatsang molaetsa ona oa bofelo.

*\*Ithute thuto ea beke ena ho lokisetsa Sabatha sa la 19 Loetse.*

## Molaetsa oa Petrose oa ‘Nete ea Kajeno

Hohle nalaneng ea pholoho, ha e sa le Molimo o romela molaetsa o khethehileng ka Lentsoe la boporofeta ho lokisetsa batho se tlang. Molimo ha a tšoaroe tsome (Esa. 46:9, 10). O lokisetsa batho ba Hae bokamoso ka ho romela baporofeta ho senola molaetsa oa Hae pele kahlolo e oa (Amose 3:7). Matsatsing a pele ho Moroallo, Molimo o ile a romela molaetsa lefatšeng ka Noe hore Moroallo oa tla. Egepeta, Molimo o ile oa phahamisa Josefa ho lokisetsa nako ea tlala nakong ea lilemo tse supileng tsa nala. Baporofeta ba ba-Juda ba ne ba hlokomelisa baetapele ba Iseraele ka tšenyeho e tlang ea Jerusalem ka makhotla a Babilona. Molaetsa oa pako oa Johanne Mokolobetsi o ne o lokisetsa sechaba ho tla ha pele ha Jesu.

**Bala 2 Petrose 1:12. Petrose o sebelisa puo e fe ho hlalosa molaetsa oa Molimo molokong oa hae?**

---

**Bala 2 Petrose 1:16–21. Ke o fe molaetsa oo oa “nete ea kajeno” oo Petrose le barutuoa ba neng ba u phatlalatsa?**

---

Molaetsa oa bohlokoa ba ka ho sa feleng nakong ea mongoaha-khoho oa pele e ne e le hore Kreste o tlike. Lerato la Ntate le ne le bonahalitsoe ka sehlabelo sa Kreste sefapanong. Leha e le hore “moputso oa sebe ke lefu,” bophelo bo sa feleng ho bohle bo netefalitsoe ka Kreste. Ke khetho ea rona hore na ka tumelo re tla bo amohela (Baroma 3:23, Baroma 6:23, Baef. 2:8). Molaetsa ona oa pholoho e ho Jesu ha u ka ke oa fetoa ke nako. Ke ‘nete ea kajeno molokong o mong le o mong. Buka ea ho qetela ea Bibeletse, Tšenolo, e hlahisa Jesu le pholoho ea Hae ea bosafeleng moeelong oa mehla ea bofelo ho lokisetsa batho ho khutla ha Hae ho haufi. E senola bohata ba lithuto tsa batho le borapeli bo tsepameng holim’a bo-‘na. Ho tloha qalong ho ea fihla qetellong, Tšenolo e senola Jesu le mosebetsi oa Hae bakeng sa botho. Jesu ke paki ea ‘nete ea semelo sa Ntat’ae. Ke “Morena oa marena a lefatše.” Ke Eena ea “re ratileng, ea re hlatsoitseng libe tsa rona ka mali a hae, a ba a re bea marena le baprista ho Molimo, Ntat’ae” (sheba Tšen. 1:1–6). Tšenolo kaofela ha eona e bua ka Jesu le molaetsa oa Hae oa nako ea bofelo ho lokisetsa batho ba Hae ho khutla ha Hae ho haufi.

**Ha u nahana ka buka ea Tšenolo, ke eng se tlang kelellong ea hau? A na mehopoloe ea hau e ba ea libatana le lipapiso tsa boporofeta ho feta ka Jesu? U nahana Jesu o re file boporofeta ba Tšenolo hobaneng? Bo senola maano a Hae a lerato bakeng sa botho joang?**

## Chalimo ea Nako ea Bofelo ea Tšenolo

Lievangeli li li talimile haholo-holo ho tlang ha pele ha Jesu. Li tlaleha pale ea tsoalo ea Hae, bophelo ba Hae le bosebeletsi, le lefu la Hae le tsoho. Leha li bua ka ho tla ha Hae ha bobeli, oo ha se oona 'mokatoba oa tsona. Chalimo ea mantlha ea buka ea Tšenolo, leha ho le joalo, ke sehlohloho sa ntoa ea makholo-khoho a lilemo. Boporofeta ba eona ba mantlha ka bo 'ngoe bo felella ka ho khutla ha Morena ka khanya.

**Bala Tšenolo 1:7, Tšenolo 11:15, Tšenolo 14:14–20, le Tšenolo 19:11–18. Ke pheletso li fe tse tšoanang tseo u li bonang litemaneng tsee?**

Ho tloha khaolong ea pele ho isa ho ea ho qetela ea buka ea Tšenolo, sehlohloho sa boporofeta bo bong le bo bong ke ho tla ha Jesu. “Konyana e hlabiloeng” (Tšen. 5:12) e tla hape e le Morena oa marena le ‘Musi oa babusi (Tšen. 19:16). O tla hlōla lira tsa Hae tsohle tse hatellang le ho hloriga batho ba Hae (Tšen. 17:14). O tla ba lopolla tlakotsing ea bona ea sebe a ba ise hae khanyeng. Ntoa e khoho pakeng tsa botle le bobele tla felisoa. Lefatše le tla nchafatsoa, ‘me balopolloa ba tla phela le Morena oa bona ka ho sa feleng (Tšen. 21:1–4). Ho Tšenolo 22:7 (sheba le teman ea 12, 17 le 20), Jesu o re: “‘Bona, ke se ke e-tla kapele! Ho lehlohonolo ea bolokang litaba tsa boporofeta ba buka ena!’” Ka mokhoa o joalo, boipiletso ba ho qetela ba Jesu ho batho bohle ke hore ba arabele lerato la Hae, ba amohele mohau oa Hae, ‘me ba latele ‘nete ea Hae hore ba tle ba lokele ho tla ha Hae ho haufi. Tšenolo e qetella ka memo ea Jesu, “Moea le monyaluo ba re: ‘Tloo!’ Le ea utloang a ke a re: ‘Tloo!’” (Tšen. 22:17). Morena oa rona o mema bohle ba batlang bophelo bo sa feleng ho tla ho Eena. Kamor’a moo o mema rona bohle ba amoehetseng molaetsa oa pholoho, ba emetseng ho khutla ha Hae ka cheseho ho ikopanya le Eena ho mema ba bang hore ba amohele molaetsa oa lerato la Hae. O re roma ho ea arolelana molaetsa oa Hae ho lokisetsa lefatše ho tla ha Hae ho haufi. Ha ho na ntho e khotsofatsang joalo ka ho sebetsa le Jesu thomong ea Hae ho lefatše. Ha ho na ntho e khotsofatsang joalo ka ho sebetsa ‘moho le Jesu leanong la Hae la topollo la mehla ea bofelo.

**Kreste, o tla kapele? Johanne o ngotse mantsoe ao lilemo tse ka bang 2,000 tse fetileng. Leha ho le joalo, re ipapisitse le kutloisiso ea rona ka boemo ba bafu, hobaneng ha ho tla ha bobeli ha Jesu, ho e mong le e mong oa rona maiphihlelong a rona ka bo mong, e leng taba ea hang hang kamor’a ho shoa ha rona? Taba ee e re thusa joang ho utloisisa na ho tla ha Kreste ho potlakile ha ka kae?**

## Molaetsa oa Mehla ea Bofelo oa Tšenolo

Khubu ea taba e ho Tšenolo khaolo ea 14. Khaolo ena ke ea bohlokoa haholo ho batho ba Molimo ba phelang matsatsing a ho qetela a nalane ea botho. E fana ka molaetsa oa Molimo oa matsatsi a ho qetala ho batho. Molaetsa ona oa mehla ea bofelo o bohlokoa ho batho ba Molimo le ho batho bohle.

**Bala Tšenolo 14:14–20. Ho sebelisitsoe papiso li fe moo ho tšoantša ho khutla ha Morena oa rona?**

---

Papiso ea kotulo e sebelisitsoe Bibeleng eohle ho hlalosa ho khutla ha Kreste (Matt. 13:37–43, Mareka 4:29). Ho Tšenolo 14, kotulo ea lijo-thollo tse butsoitseng e tšoantša topollo ea ba lokileng ha kotulo ea morara o phrekaneng e tšoantša tšenyeho ea ba khopo. Tšenolo 14:6–12 e phuthetse molaetsa o potlakileng oa matsatsi a bofelo ho lokisetsa banna le basali kotulo ea mapomelo ea lefatše.

**Bala Tšenolo 14:6, 7. ‘Mokotaba oa molaetsa o fumanehang litemaneng tse peli tsee ke o fe? Li re thusa joang ho utloisisa hore na re bo mang re le Baleti ba Letsatsi la Bosupa?’**

---

Molaetsa oa lenyeloi la pele ho Tšenolo 14 o ipiletsa ho moloko oa mongoaha-khoho oa 21 o ngongorehelang hoba le lebaka la ho phela. O fana ka evangeli ea mohau oa Molimo e fanang ka tšoarello ho bohle. E re hlatsoa makhopo ohle a sebe ‘me o re fa matla a ho ba bahloli. Molaetsa ona o fana ka motheo oa boleng ba motho ka mong ka hore Kreste o re bopile a ba a re lopolla. O supa hore ka letsatsi le leng ho hloka toka hohle ho tla fihla pheletsong kahlolong ea mapomelo ea Molimo. Ke litaba tse monate haholo hobane o senola hore bokhopo ha bo na hlola ka ho sa feleng.

**“Ka tsela e khethehileng Baleti ba Letsatsi la Bosupa ba beuoe lefatšeng e le balebeli le ba tšoereng leseli. Ba tšepetsoe tlhokomeliso ea ho qetela ea lefatše le timelang. Ba boneselitsoe ke leseli le hlolang le tsoang Lentsoeng la Molimo. Ba filoe mosebetsi oa bohlokoa o mahlonoko ka ho fetisisa—ho phatlalatsa molaetsa oa lenyeloi la pele, la bobeli, le la boraro. Ha ho na mosebetsi o mong o moholo ho feta ona. Ha ba lokela ho lumella ho hong hosele ho nka nako ea bona. Re le kereke, re bohlokoa ho feta hoo, re le batho ka bo mong, re ka nkela mantsoe aa hloohong joang?”**

## Ho Utloisisa Molaetsa oa Molimo ka Botlalo

Molaetsa oa mehla ea bofelo oa Tšenolo o hlhisa Jesu botlalong ba mohau oa Hae o pholosang batho bohle (Tšen. 14:6). Ke boipileto bo tiileng ba ho “tšaba” kapa ho fana ka hlomphe ho Molimo ka sohle seo re se etsang—ho hlomphe litaelo tsa Hae le ho latela molao oa Hae ka moelelo oa kahlolo ea Molimo (Tšen. 14:7). Ho “tšaba Molimo” ho amana le kamoo re nahanang. Ke boipileto ba ho phelela ho khahlisa Molimo le ho mo beha pele mehopolong ea rona eohle. Ke botšoaro ba kutlo bo re tataisetsang ho pheleng maphelo a lokileng (Liprov. 3:7, Liketso 9:31, 1 Pet. 2:17). Molaetsa ona o boetse o re memela ho “isa khanya” ho Molimo. Ho isa khanya ho Molimo ho amana le seo re se etsang lintlheng tsohle tsa maphelo a rona.

**Bala Moekesela 12:13, 14 le 1 Bakorinthe 6:19, 20. Litemana tsee li re thusa joang ho utloisisa se boleloang ke ho tšaba Molimo le o isa khanya ho Eena?**

---

Mengoaheng ea boitšoaro bo hlephileng, ha limilione tsa batho li iikutloa li sa ikarabelle ho mang kapa mang ha e se ho bona, molaetsa ona oa nako ea ho ahlola o re hopotsa hore re na le boikarabello ka liketso tsa rona. Ho na le kamano pakeng tsa katamelo ea hlomphe ho Molimo, kutlo ho Molimo, le kahlolo. Kutlo ke tholoana ea kamano e bolokang le Jesu. Ke ho loka ha Hae feela ho lokileng ho lekana hore ho ka feta kahlolong, ‘me ho lokeng ha Hae, re bolokehile. Ka ho loka ha Hae re phelela ho tlotlisa lebitso la Hae ka sohle seo re se etsang.

**Bala Tšenolo 14:7, Tšenolo 4:11, Genese 2:1–3, le Exoda 20:8–11. Motheo oa khumamelo eohle ea ‘nete ho Molimo ke o fe, ‘me Sabatha e bontša kutloisiso ee joang?**

---

Satane o hlasetse Sabatha hobane a tseba hore ke eona khubu ea khumamelo. E phahamisa Krete e le ‘Mopi hape e ipiletsa ho banna le basali bohle ba leng hohle ho “khumamela ea entseng maholimo le lefatše” (Tšen. 14:7). E bua ka molaetsa o amehang nakong ena ea boithlolo [evolution]. E re khutlisetsa ho khumameleng Jesu ea re bopileng ‘me ea re fang moelelo oa boleng ba ‘nete ho Eena.

**Nahana kamoo Sabatha e leng bohlokoa kateng e le sehopotso sa Molimo e le ‘Mopi oa rona, kahona, e leng Eena feela ea loketsoeng ke khumamelo ea rona. Ebile, ke thuto e fe esele e bohlokoa hoo Molimo a laelang, a laelang hore karolo ea bosupa ea maphelo a rona beke le beke e be ea Hae e le ho re thusa ho mo hopola hore ke ‘Mopi oa rona?**

## Boipiletso ba ho Qetela ba Molimo

**Bala Tšenolo 14:8, Tšenolo 17:3–6, le Tšenolo 18:1–4. Re ithuta eng ka Babilona ea moea litemaneng tsee?**

Bukeng ea Tšenolo, lentsoe “Babilona” le tšoantša tsamaiso ea borapeli ba bohata e itšetlehileng mosebetsing ea motho, litloaelo tse entsoeng ke motho, le lithuto tse khelohileng. E phahamisa batho le boitokafatso ba bona holim’a Jesu le bophelo ba Hae bo se nang sebe. E beha litaelo tsa batho bao e leng baruti ba borapeli kaholimo ho litaelo tsa Molimo. Babilona e le e le setsi sa borapeli ba litšoantšo, borapeli ba letsatsi, le thuto e khelohileng ea moea o sa shoeng. Tsamaiso ena ea borapeli e lohelletse ka masene litloaelo tse ngata tsa borapeli ba Babilona ea khale khumamelong ea eona. Molaetsa oa mehla ea bofelo oa Molimo lefatšeng le timelang ke molaetsa oa Jesu le ho loka ha Hae. O hooeletsa boipiletso ba leholimo, “‘O oele, o oele Babilona e moholo. . . Tsoang ho eena, lona sechaba sa ka’” (Tšenolo 18:2, 4). Molimo ka khalalelo ea Hae o hlahisitse Kereke ea Baleti ba Letsatsi la Bosupa ho phahamisa molaetsa oa Kreste botlalong ba oona bohle. Ho phahamisa Jesu ke ho phahamisa tsohle tseo a li rutileng. Ke ho phatlalatsa Eena eo e leng “tsela, le ‘nete, le bophelo” (Johanne 14:6). Ke ho pepesa le phoso tsa Babilona khahlanong le linnete tsa Jesu.

**Bala Tšenolo 14:7, 9–11. Ke bobeli bo fe bo khumameloang boo ho buuang ka bona litemaneng tsee?**

Tšenolo 14 e hlalosa liketso tse peli tsa borapeli—khumamelo ea ‘Mopi, le khumamelo ea sebata. Borapeli bona ka bobeli khubu ea bona ke letsatsi la Molimo la khumamelo, Sabatha ea ‘nete le Sabatha ea bohata e e nkelang sebaka. Sabatha e fana ka phomolo, tiisetso, le tšireletso eo re nang le eona ho Kreste ‘Mopi oa rona, Molopolli, le Morena ea tlang. Ea bohata e hlahisa hoa bohata hoa motho ho e nkelang sebaka ho itšetlehileng kelellong ea motho le litaelo tsa motho.

**Bala Tšenolo 14:12. Temana ee e re’ng, haholo-holo moeelong oa se tšileng pele? Molao le mohau li bonahatsoa joang temaneng ee, ‘me e lokela ho re ruta eng ka kamoo molao le mohau e leng lintlha tse peli tsa evangeli tse sa arohaneng?**

## Ho Ithuta Haholoanyane:

“Molimo o bitsitse kereke ea Hae mehleng ena, joalo ka ha a ile a bitsa Iseraele ea khale, ho ema joalo ka leseli lefatšeng. O ikaroletse bona ka sabole e kholo ea 'nete—molaetsa oa lenyeloi la pele, la bobeli, le la boraro—ho likereke le ho lefatše ho ba tlisa katamelong e halalelang ho Eena. O ba entseng polokelo ea molao oa Hae 'me a ba tšepela linnete tse kholo tsa boporofeta ba nako ena. Joalo ka litaba tse halalelang tse neng li tšepetsoe Iseraele, tsena ke tse halalelang tse tšepetsoeng ho bona tse lokelang ho bolelloa lefatše. “Manyeloi a mararo a Tšenolo 14 a tšoantša batho ba amohelang leseli la molaetsa oa Molimo 'me ba tsoela pele e le baromuoa ba Hae ho ea phatlalatsa tlhokomeliso ka bophara ba lefatše. Kreste o re ho balateli ba Hae: 'Le leseli la lefatše.' Mattheu 5:14. Ho moea o mong le o mong o amohelang Jesu, sefapano sa Golgotha ea bua: 'Bonang boleng ba moea. "E eang ka lefatše lohle, le bolelle babopuoahle bohle evangeli.” Mareka 16:15. Ha ho na ntho e lumelletsoeng ho sitisa mosebetsi ona. Ke mosebetsi oa bohlokhoa ka ho fetisisa oa nako ea rona; o lokela ho fihlela hole joalo ka bosafeleng. Lerato leo Jesu a le bonahalitseng ho meea ea batho ka sehlabelo seo a se entseng bakeng sa topollo ea bona, le tla susumetsa balateli ba Hae bohle. “Kreste oa amohela, 'me ka thabo e kholo! Motho e mong le e mong ea inehetseng ho Eena. O tlisa botho kopanong le tsa leholimo, hore a tle a buisane le lefatše ka liphiri tsa lerato le bileng nameng. Bua ka oona, rapela ka oona, bina ka oona, tlatsa lefatše ka molaetsa oa 'nete, 'me o tsoele pele ho phunyelletse libakeng tse mose.”—Ellen G. White, *Counsels for the Church*, maq.58, 59.

## Lipotso tsa Puisano:

1. Molaetsa ea Manyeloi a mararo e ho Tšenolo 14 e hloaea boleng ba Kereke ea Baleti ba Letsatsi la Bosupa joang?
2. Nahana ka Sabatha le bohlokhoa ba seo e se emetseng. Joalo ka ha re bone bekeng ena, molaetsa oo e o phuthetseng o bohlokhoa hoo Molimo a laelang hore re behelle kathoko karolo ea bosupa ea bophelo ba rona hore re tle re mo hopole joalo ka 'Mopi oa rona le Mopholosi. Hape, ho fapana le thaba e halalelang kapa motse o halalelang, ha rea lokela ho ea ho eona ho khumanela. Beke e 'ngoe le e 'ngoe, ka lebelo la limaele tse ka bang sekete ka hora (bonyane pela bohare ba lefatše equator), Sabatha e tla ho rona. 'Nete ee e boela e re thusa ho utloisisa bohlokhoa ba letsatsi lee le seo le se supang joang?
3. Re ka hlalosa taba ea ho oa ha Babilona kapa taba ea letšoao la sebata ka tsela e hapang joang? Ke hore, ke joang re ka behang 'nete ee ka tsela e sa khopiseng kamoo ho ka khonehang, leha re lokela ho utloisisa hore ho sa natse liteko tsa rona tse tsoang pele ho na le batho ba ntse ba tla khopeha?